



DEO OPTIMO MAX.

UNI ET TRINO,

VIRGINI DEIPARÆ, ET S. LUCÆ

Orthodoxorum Medicorum Patrono.

QUÆSTIO MEDICO-CHIRURGICA,

QUODLIBETARIIS DISPUTATIONIBUS

manè discutienda in Scholis Medicorum, die Jovis tertiâ Martii.

M. DCC. XL.

M. JOANNE-BAPTISTÂ MONGIN,

Medico Regis ordinario, Doctore Medico, Præside.

*Utrum Prægnanti Mulieri, acutissimo dentis dolore laboranti,
eiusdem dentis evulso?*

I.



INTEGRAM humani corporis machinam, solidis liquidisque intermixtis constare, nemo est qui eat inficias, nisi illius structuræ & fabricæ rudis & imperitus. Partes cum solidæ, tum fluidæ, quatuor innittuntur principiis componentibus, sale nimirum, aquâ, terrâ, & sulphure; quæ quidem strictiore nexu, in solidis, in liquidis, ut potè ab invicem discretæ, laxiore com-

A

mercio uniuntur. Utraque motum habent à subtiliori (ut aiunt) materiâ, quæ ultima est Physicorum meta; quam ultra progredi, humanæ menti non datum est; nisi audaciùs velit primarias rerum causas, id est Deum ipsum maximum, scrutari & introspicere. Hasce partes solidas, tubulorum ordinatam compagem referre, jure asseratur; quas inter, sensum sine sensu permeant partes liquidæ, quæ prioribus concretæ, accretionem ipsis & extensionem, homogeneo succo, conferunt, donec & longitudinem & latitudinem à primo motore, pro naturâ suâ circumscriptas, adipiscantur: quibus ad certum tempus peractis, matura stant solida, nec ultrâ, quidquam incrementi à fluidis recipiunt, nisi quantum satis sit ad resarciendas vires quas nimio usu, & iteratâ transpiratione amittunt: ac demùm, eò, lapsu temporis deveniunt, ut obtuso hebetatoque genuino elaterio, paulatim marcescendo decrescant, præcludantque omnem aditum fluidis, unde reviviscerent. Hinc fit ut ipsa fluida, orbata suo usu præ insolitâ & diuturniori commoratione absque motu, coagulentur & vitientur, totiusque molis minitentur ruinam: nam cum humani corporis sanitas imprimis posita sit in vivificâ illâ, variæ indolis, succorum mole, quibus irrigatur tubulorum compages; & in perenni ac æquali solidorum motu, quo premuntur & atteruntur fluida, ad sua, pro præscriptis à naturâ legibus, obeunda munera, in irrigatione tubulorum: ut primum perturbatur consuetus ordo solidas inter liquidasque partes, æquilibrium cadat necesse est; dirutoque illo mirabili concentu, susdeque miscentur omnia, non sine horrendâ, morborum, omne genus, diluvie: Quas quidem fervidas malorum scaturigines, voluit summus rerum Arbiter Medicinâ, à veris Medicis profligari, aut deflecti posse: Unde hanc artem propè divinam quisque sapiens colere, summumque ad apicem perducere debet.

I I.

QUANTUS quantus sit homo, totus à naturâ morbus est, quia supremo, nec unquam revocando decreto morti nascitur: quippe, ut primum in almam prodit lucem, gemitibus, futuræ miseriæ suæ præsciis, notat suum in orbem, flebilem ingressum, egressumque flebiliorem. Mortis scilicet fermentum, aut

vitio parentum haustum ab ipso conceptu, aut paulo post à pravis cupiditatibus hauriendum, totam molem paulatim corrumpendo permeat, seseque penitiùs ipsis medullis inserit; quin & res ipsæ quas natura, alendis, fovendis, recreandisque animantibus benigna sufficit, fortuito sæpè casu, sæpiùs abusu, in ejus vertunt perniciem; quales sunt aër ipse quem trahimus; cibus potusque; motus & quies; somnus & vigilia; excreta & retenta; imprimisque gravia animi Pathemata. Natus ad laborem homo; Felix, si medias inter pœnas ærumnasque quas sibi solacias adjungit labor, præsertim improbus, posset acutis carere doloribus! Haberet unde cætera mala tantisper solaretur: sed quæ pessima est ejus conditio, conceptus in corpore externus dolor, ignorâ viâ, ad intimam usque animam sibi iter aperit; eamque totus ità involvit, ut vix ac ne vix quidem, sit sui compos. Ad ciendos in anima tantos doloris motus, quam sæpè exigua causa! Vel tantilla pars acerbioris succi, cujus acrimoniâ & corrosione perstringatur nervosa quælibet fibra, statim sese comprimit arrigitque totum corpus, & transmissâ, citò citiùs, spirituum animalium copia, ad cerebrum usque pertingit, in ea potissimum sede ubi assolet suos affectus explicare anima; eamque infixus dolor admonet dolere cum corpore, imò & ferventiùs. Et reverà si abscindatur continuò, aut obstruatur nervus cujusvis membri acri dolore perciti, interciso canali quò, summo impetu spiritus vehebantur ad cerebrum, nullo ampliùs afficitur, nec motus nec doloris sensu. Cum enim alveolorum infima pars, gracili admodum membrânâ nerveâ contexta sit, cui, fibrarum ope, adhæret dentium radix, illarum irritatione & tensione commoveatur & cerebrum; unde nil mirum si hinc dolor oriatur acutissimus, summo sæpè cum periculo; ac præcipuè in prægnantibus, in quibus humores parte ab omni turgescunt, faciliùs quoque exasperantur, ità ut sæpè sæpiùs singula prægnatio, cum atroci dolore, singulum aggrediatur commoveatque dentem; cui quidem dolori vix mederi ullâ arte queas, nisi solâ extractione.

SI pręnantibus, & adultis nocet acutus dentium dolor, quanto magis metuendus est recens natis infantibus! Tantum exinde imminet periculum, ut, si unā simul ab alveolis maxillaribus dentes erumperent, infans, procul dubio, præ nimio dolore extingueretur. Sed provida altrix natura eos aliquot post menses successivè apparere jubet, primo quidem incisivos, caninos postea, ac postremo molares, prout vires crescendo acquirit infans. Dentes omnes & singuli pro suo ordine in embrione delipeantur, haud secus ac cęterę humani corporis partes. In intimis factus aut infantuli alveolis, mollis quędam congesta materies, albicula, glareosa, in membranoso crispatoque sacculo deprehenditur; quam vocant *nucleos*, vel *folliculos*, seu potius *germen dentium*. Immixtę sunt germini, conglobatę fibriculę, validè inhærentes membranę alveoli, ipsique maxillarum substantię, perque illarum poros exilit succus, cuilibet informando denti quoad sedem, figuram, molemque, maximè idoneus. Vehitur ille succus elapsus per poros, sanguinearum arteriarum ope, donec tantisper consolidatus in denticulum, incrementum sumat & formam, ac longitudinem, duritiemque determinatam acquirat: quę omnia, non sine scissurę lacerati germinis & gingivarum membranę, fieri assolent; unde dolores acerrimi quos infantes vagitibus & lachrymis testantur; unde, paulò post, crebri lactis corrupti vomitus, febris, insomnia, stomachi & ventris tormina, alvi fluxus, nervorum contractio, ipsa mors! Quod si ad primos illos vitę humanę scopulos in ætate tenerrimā non allidantur infantes; si devictā tempestate sumptisque viribus eis surgat plurium dentium ordo nitidior, longioris ævi curriculum, teste Hippocrate spondet hoc signum & sanitatis & roboris; asserente eodem, *L. 2. Epid. S. 6.* nitidos validosque dentes longævam prænotare vitam, eò quod scilicet, dentes hujusmodi, molendis alimentis aptiores, genuinam disponant digestionem, quę continuò plurimùm confert ad obeunda, cum laude, cętera munia, quibus recta constat œconomia animalis.

PRÆGNANTIS mulieris conditio si perpendatur attentius, hanc esse, tunc temporis, compendiosam morborum officinam, nemo diffitebitur. Vix primum latens in virili semine homoncio fecundum matris attigit ovum, cum tota, à capite ad calces subvertitur massa sanguinis, certantesque inter sese humores, miras cient procellas. Tantæ scilicet molis est hominem, eximium illud naturæ & opus & ornamentum; condere: Vix in utero suscepit fœtum, cum sese gravidæ recens mulieri fidos adjungunt comites, symptomata omne genus, cibi fastidium, nausea, crebri vomitus, intestinorum tormina, fluxus alvi, vertigines, cephalagia, spasmus, &c. Si medium gestationis iter summo labore superaverit, heu, miscella: tussi, cordis palpitatione, lypothimiâ, hæmorrhagiâ narium, catharro, torquetur, &c. Si ad metam propior, cæteris ægrè superatis, advenerit, vetera, novis incommòdis excipiuntur; urget urinæ suppressio, pigrioris alvi durities, abdominis scissuræ, instans proximi periculi metus, &c. Nihil tamen illam acrius pun gere assolet quàm non ferendus dentium dolor: tument scilicet in prægnatione humores præter solitum; fervent catharri quorum acrimoniâ gengivæ aduruntur; convelluntur ab alveolis dentium radices, & crebris obruuntur subsultibus, unde accidit ut aliis, quasi sponte suâ, dentes excidant; aliis exurgant, sibi que viam summo dolore aperiant, quos vocant *dentes sapientiæ*. Dum gerunt infantes in utero, tanta est in matribus Pathematum vis ac potestas, ut fœtibus suis suamque formam & mores & morbos imprimis incutiant, iisque omnibus induti ante partum, subeant lucem, numquam nativa hæc indumenta deposituri. Quorum exempla quia ultramodum suppetunt & præstosunt, mittenda satius duxerim. Sed ex illis intellige quanta sit Medicis adhibenda cura ut prægnantes ad felicem puerperii exitum possint perducere, removendo scilicet ex arte, quidquid fore nocivum aut puerperæ aut ejus fœtui, seu in corpore, seu in mente, intellexerint.

OMNIUM ferè temporum experienciâ compertum est, nullum esse utilius, nullum præsentius remedium laborantibus dente aliquo, foetido præsertim & carioso, quàm ejusdem avulsio promptissima; quæ medendi ratio, & in fragiliori sexu, & ætate cum juvenili tum provectâ, tempestate omni, ubique locorum, non obstante etiam morbo, cum laude ægrique levamine, adhibetur: Nunc dejiendus, quod alio non repercutiente, compressionis defectu emineat, voci & masticationi nocendo maximè; modò, quod carie contaminatus, vicinos, quasi ex propiore ac divagante oris lue, corrumpat; non numquam, quod exacerbatus ab introeunte & subeunte aëre, aut laceffitus à prementibus cibus, vel à frigidiore potu, tot tantisque vibratis aculeis impetitur, ut contra perstringentis aciem doloris, stare nemo possit æquo animo ad resistendum; unde febres, tumores, convulsiones, insania, abortus, ipsa mors, quandoque subsequantur. Soli ne prægnanti mulieri opem deneges, intempestivo metu nocendi, quem gerit, fructui? Imò; inter ægros illi subveniendum imprimis, quæ vel suo titulo, debet orbi hominem, quem solvat felici partu; atque utinam sine dolore, quo, reverendo & amabili novæ matris nomine, carere omnino debet, utpote cui rem maximam adimplere incumbat, novi scilicet advenientis hominis partum. Caveat tamen diligentur Chirurgus, ne infons ex prægnantis ore ejiciatur dens, nusquam rediturus; cautelâ quoque utendum, ne aspectu instrumenti, quo de sede dens æger evellendus, plus contremiscat prægnans, quam ab ipsa ejectione; utque se priùs sublevatam, quam ferro aggressâ sentiat! Dum ergo prægnans maleficum dentem tantùm experiri ac titillare doctâ manu & sollicitare videbitur Chirurgus, eâdem aquâ & validâ, successusque consciâ, ad radicem usque evellat tam subito dentem, ut doloris brevitatem compenset fugati doloris solatium. Sicque sublatâ morbi causâ, ponunt tempestates; depravati humores in fundo alveoli stagnantes expelluntur; sanguinis & lymphæ in omnibus maxillæ partibus, liber restituitur circulatio; donec

nullâ deinceps obstante causâ maturescat fructus, maturusque;
quasi sponte cadat.

*Ergò Prægnanti Mulieri, acutissimo dentis dolore laboranti;
ejusdem dentis evulso.*

DOMINI DOCTORES DISPUTATURI.

*M. Henricus - Franciscus
Bourdclin.*

*M. Robertus - Hubertus
Linget.*

*M. Joannes-Baptista-Thomas
Martineng, Chirurgia Pro-
fessor.*

*M. Antonius - Joannes
Daval.*

*M. Achilles - Franciscus
Fontaine.*

M. Franciscus Pouffe.

*M. Otto Casimirus Barfke-
necht.*

*M. Joannes-Bapt. Ludovicus
Chomet, Medicus Regis or-
dinarius designatus.*

*M. Thomas - Bernardus
Bertrand.*



Proponebat Parisiis, BENJAMIN-LUDOVICUS LUCAS,
Laudunensis, Baccalaureus Medicus, A. R. S. H. 1740,
à sextâ ad meridiem.